

# Matxoelacarta, Pablo lelpox, Timoteoliajwa

---

## Pablo lelpox carta Timoteoliajwa

**1** Xan Pablo, Jesucristo pej-apóstolan, japon pejuwajan jiw naewuajnalijwan. Dios, jiw bæ'weyaxaelpon, japon xan namakafit Jesucristo pej-apóstolliajwan. Wajpaklon Jesucristo, xatis wuajnowechpon pasliajwasik, japonbej namakafit pej-apóstolliajwan. **2** Timoteo, ampox carta lelx xamliajwa. Xam, me-ama taxuɫnam, naknaexasitam xot Jesús pejuwajan, naewuajnax wut. Samata, xan waj-ax Dios kawuajnax, wajpaklon Jesucristobej, xam kajachawaesliajwapi, xam beltaeliajwabejpi. Dios kawuajnaxbej xam chiekal dukaliajwam Diosliajwa, Jesúsliajwabej, jiwliajwabej.

## Pablo to'apox Timoteo, japon buxfiasliajwa asawuajan naewuajanpi

**3** Macedonia tuajnu poxadax wut, xam to'ax namanaliajwam Éfeso paklowaxxot japi jiw chiekal naewuajnalijwam. Xan nej-xasinkax xam jaxot namanaliajwam asew jiw buxfiasliajwam, japi naewuajanpi asawuajan Jesús pejuwajanliajwa. **4** Japi jiw naewuajanbej asawuajan, pajut faekwuajan. Chapaeibejpi puexa pejuwajanpijiw isroxan. Jarawuajan pachaema-el japijiajwa. Jarawuajanliajwa jiw nakaewa najum-aech wut, asbuɫn jumch nakaewa nabunloti. Samata, jiw kaes Dios xanaboeja-el naexasisliawapi Jesús pejuwajan.

**5** Samata, xam to'ax japi jiw buxfiasliajwam. Dios nejxasink xatis naewuajnalijwas, nakaewa nanejxasinkaliajwasbej. Samata, nakaewa nanejxasinkas wut, isaxaes pachaempoxan nakaewaliajwa. Dios chiekal xanaboejaxaesbej. Nejchaxoelaxisal isliawwas pachaema-elpoxan. **6** Asew japixot nakaewa nanejxasinkpox nakofapi. Amwutjel japi jiw asbuɫn jumch nakaewa

najum-aechful pachaema-elpoxan. 7 Japi naewuajan wut Moisés chajia lelpox, nejxasink asew jiw jumchiliajwas japiliajwa: “Ampi jiw chiekal naewuajan Moisés chajia lelpox” —chiliajwas. Japi, me-ama chiekal matabija wut, ja-aechi. Pe japi jiw pajut chiekal matabija-el Moisés chajia lelpox.

8 Xatis matabijas, Moisés chajia lelpox pachaem japox jiw naewuajnalijwas. Pe jiw chiekal pajut matabijaxael, ma-aech xot Moisés japox lel. 9 Xatis wajut matabijaxaes ampox. Paklochow lel wut tato'alpox, japi japox lela-el fiasliajwa jiw, ispi pachaempoxan. Japilax japox lel jiw fiasliajwa, babijaxan is wut, kastikaliajwabejpi. Japox lelbejpi kastikaliajwa jiw, sitae-elpi Dios, naexasis-elpibej Dios. Japox lelbejpi kastikaliajwa paxjiw bapi, penjiwbej, asew jiwbej. 10 Japox lelbejpi fiasliajwa poejiw bu'moejsasamata asew watho', watho'bej asew poejiw bu'moejsasamata. Japox lelbejpi fiasliajwa nakaepojwa nabu'moejsasamata, watho'bej nakaewatho'a nabu'moejsasamata. Japox lelbejpi fiasliajwa asew jiw mowasamata asatujnuchannel, japi jiw esclavos nadofaliajwa. Japox lelbejpi fiasliajwa jiw kichachajbasamata. Japox lelbejpi fiasliajwa, jiw jumduw wut japox is-elasamata. Japox lelbejpi fiasliajwa naexasislasamata diachwujnakolaxwujajan. 11 Jesús pejwujajan, chimiawujanaxot, jum-aech japox diachwujnakolaxwujajan, Dios nabuxto'apox naewuajnalijwan. Dios, japon xabich pachaem.

### **Pablo gracias-aechpox Jesucristoliajwa, Jesucristo kawujajan wuton**

12 Wajpaklon Jesucristo chiekal matabijt, japon nato'apox isaxaelenpox. Samata, japon pajut nakajachawaesful, asew jiw naewuajnaj wut japon pejwujajan. Samata, gracias-an Jesucristoliajwa, Jesucristo kawujajnaj wut. 13 Majt naexasis-enil wutfuk Jesús pejwujajan, xan jum-ansfulax babejjamechan Jesúsliajwa. Chakifolxbej naexasiti Jesús pejwujajan. Japox isx wut, Dios nakiowa nabeltaen. Japox isfulax wut, xan tajut chiekal matabijs-enil, babijax isfulax wut, naexasis-enil wutfuk Jesús. 14 Wajpaklon Jesucristo xan xabich nakajachawaet. Samata, japon naexasitx kaes xanaboesliajwan. Do jawut, japon nakajachawaetbej asew jiw nejxasinkaliajwan.

15 Ampox diachwujnakolax. Samata, puexa jiw chiekal naexasisaxael. Jesucristo fuloek ampathatasik jiw, babijaxan ispi,

bũ'welíajwa. Xan kaes babíjxan ísx. Me-ama puexa asew jiw, xan jachi-eníl. **16** Xan japoxan ísx wũt, Dios nakiowa nabeltaen. Ja-aech wũt, puexa jiw chiekal matabíja Jesucristo xabich piach palala-elpox xanlíajwa. Japon kamta xan nakastíka-el, naexasísfula-eníl wũt. Samata, jiw pajut chiekal matabíjaxael, xabich wũti babíjxan íspoxan, Dios nakiowa beltaeyaxaesí, me-ama xan Dios nabeltaen. Japí jiw Dios beltaens wũt, duílaxael pomatkoícha Diosxotse. **17** Samata, pomatkoícha jumchíyaxaes Dioslíajwa: “Xam xabich pachaemam” —chíyaxaes. Dios, kaen paklon puexa jíwliájwa, pomatkoíchaliájwabej. Pomatkoícha dukpon. Chinax kaen aton taeyaxíl Dios. Japon Dios chiekal kaekolan. Japon jachíyaxael pomatkoícha.

**18** Xam Timoteo, taxulan wũt, ja-am. Samata, jíse xan to'axpox asew jiw naewũajnalíajwam Dios pejjamechan! Japoxlíajwa asew jiw, naexasítí Jesús pejwũajan, majt jum-aechí xam naewũajnaxaelampoxlíajwa. Asew jiw naewũajnam wũt Dios pejjamechan, tampoelaxael. Ja-aech wũt, íxam nakiowa naewũajande! Me-ama soldawan nakiowa naba, chachóel wũt japonlíajwa, íxamlap-is ja-amde, Dios pejjamechan jiw naewũajnam wũt! **19** Japox ísam wũt, ¡Dios xanabóejsfulde! ¡Ísfuldebej pachaempoxan, me-ama xam matabíjtam ísfulalíajwam! Asew jiw matabíja wũt pachaempoxan íslíajwa, japoxan ís-eli. Samata, japí jiw kofa Dios xanabóejapoxan. **20** Japox ja-aech Himeneo, Alejandro sũapich. Samata, jum-aechí babejjamechan Dioslíajwa. Japoxan japí bũxkofalíajwa, xan japí jiw woeyax Satanásxot, wũxataelíajwapi jaxot wũt.

### **Jesús pejwũajan naexasítí Dios kawũajnaxaelpox puexa asew jíwliájwa**

**2** Timoteo, xan xabich nejasínkax naexasítí Jesús pejwũajan Dios kawũajan wũt, graciaschíyaxaelbejpi Dioslíajwa, Dios puexa jiw kajachawaetpoxlíajwa. **2** Japí, naexasítí Jesús pejwũajan, Dios kawũajnaxaelbejpi Dios chiekal kajachawaeslíajwas jiw tato'alpi, nabístíbej japílíajwa. Ja-aech wũt, ajílaxael nabeyax. Samata, xatís chiekal duílaxaes. Ja-aech wũt, xatíslíajwa chiekal pachae-maxael Dios naexasísfulalíajwas, me-ama japon nejasínk. **3** Pachaem, xatís Dios kawũajnas wũt asew jíwliájwa. Dios, nakbũ'wíapon, nejjachae mílbej, japon kawũajnas wũt asew

jiwliajwa. **4** Dios bu'wesia puexa jiw. Nejxasinkbejpon puexa jiw matabijaliajwa Jesús pejwujajan, diachwujnakolaxpox. **5** Dios kaen. Do kaes asan Dios ajil, me-ama Dios, jason. Jesucristobej kaen. Japonlap asamatkoi jiw buflaeyaxael Dios poxase. **6** Cristo pajut natapaei asajiw kimatamatlialiajwas puexa jiw babijaxan ispoxan wemosliajwapon, Dios puexa jiw bu'weliajwa. Japawujajan Dios naktapaei matabijaliajwas, naewujajnalialiasbej asew jiw ampamatkoiyan. **7** Samata, Dios xan namakafit apóstolliajwan, potujajnucha judíos-elpi naewujajnalialiajwan chimiawujajan, Jesús pejwujajan. Xan jum-anpox, diach chiekal wujajnakolax. Kichachajba-enil.

**8** Xan nejxasinkax poejiw potujajnucha Dios kawujajnalialiajwa. Japi muaxxachoejaxael, Dios kawujajan wut. Japi poejiw, chiekal pachaempi, me-ama Dios nejxasink. Palala-elpibej, asew jiw suapich. Majt nalot wut, asew jiw suapich, chiekal chaemtpibejlis. **9** Xan nejxasinkaxbej watho' naxoeliasjwa, mado' ipachaem. Do japoxantat watho' naxoeyaxael. Watho' nachaemt wut, chiekal mathiayaxael. Xabich duiyaxil oro, perlasbej. Watho' naxoeyaxilbej yiafan, xabich ommaenkpi. **10** Jachiyaxil watho', naexasiti Jesús pejwujajan. Japi watho'lax isaxael pachaempoxan asew jiw kajachawaesliajwa. Ja-aech wut, asew jiw sitaeyaxaesi. Japi watho'liajwa jumchiyaxaesbej: “Japi watho' xabich pachaem” —chiyaxaesi. **11** Poejiw Dios pejjamechan naewujajan wut, watho' boejlach chalaxael chiekal naewesliajwa. Ja-aech wut, asew jiw nejchaxoelaxael japi watho'liajwa: “Japi watho' diachwujajnakolax chiekal sitaen, asew jiw naewujajan wut Dios pejjamechan” —chiyaxael jiw, nejchaxoels wut japi watho'liajwa. **12** Xan tapae-enil watho' naewujajnalialiajwa Dios pejjamechan, jiw natameja wut. Watho'lax chiekal boejlach chalaxael naewesliajwa Dios pejjamechan. Watho' tato'laxil poejiw. **13** Dios matxoela is Adán. Do jawux, Adán pijow ispon. Samata, watho' tato'laxil poejiw. **14** Adán naekichachajba-esal Satanás. Eva naekichachajbas Satanás. Samata, japow naexasis-el Dios. **15** Watho', paxipi, chiekal isful wut puexa Dios tato'laspoxan paxi chiekal ti'sliajwa, ja-aech wut, Dios bu'weyaxaes japi watho'. Japi watho'bej chiekal naexasisaxael Jesús pejwujajan. Asew jiw nejxasinkaxaelbejpi. Chiekal duilaxaelbejpi, me-ama Dios nejxasink.

**Masi poejiw makanosaxaespoX ancianosliajwa, japi chiekal tato'laliajwa Jesús pejwujajan naexasiti**

**3** Ampox diach chiekal wujajnakolax. Kaen ancianosia wut naexasiti Jesús pejwujajan tato'laliajwa, japox bichax xabich pachaem. **2** Makafisaxaespon ancianoliajwa, japon aton chiekal pachaempon asew jiwliajwa, japonaxaellape. Japonbej puexa jiw jumtispon: “Ampon aton babijax is-el” —tispon. Japonbej kaeow pijow. Japonbej chiekal natataeful pajutliajwa isasamata pachaema-elpoxan asew jiwliajwa. Japonbej asew jiw sitaenspon. Japonbej chiekal asew jiw bu'kula, pejbatat jiw pat wut. Japonbej chiekal xajup asew jiw naewujajnalialjwa. **3** Japonbej saxa fe-el saxsliawas. Japonbej nabeyax nejxasinka-el. Japonbej nejxasinka-el nalosax, asew jiw suapich. Japonbej nejxasinka-el xabich plata kanaliajwa. **4** Japonbej chiekal tato'alpon pejbapijw. Japonbej paxi to'a wut, chiekal owtis. Japonbej chiekal sitaens paxi. **5** Kaen aton chiekal tato'la-el wut pejbapijw, ja-aech wut, japon chiekal tato'laxilbej naexasiti Jesús pejwujajan. **6** Jesús pejwujajan jelnaexasitpon, japon aton chiekal pachaem-elfuk ancianoliajwa. Japon aton makafich wut ancianoliajwa, nejchaxoelaxaelon: “Xan kaes pejme pachaeman. Me-ama asew jiw, jachi-enil” —chiyaxaelon, nejchaxoel wut. Japox nejchaxoel wut, japon aton Dios kastikaxaes. Me-ama Dios kastika wut Satanás, jachixaesbej japon aton. **7** Makafisaxaespon ancianoliajwa, japon chiekal sitaeyaxaes asew jiw, naexasis-eli Jesús pejwujajan. Ja-aech wut, asew jiw japon aton wuljumchiyaxisal. Satanásbej xajupaxil japon anciano naewujajanpox wetoesliawaspon.

**Masi poejiw makanosaxaespoX diáconosliajwa, japi kajachawaesliajwa ancianos**

**8** Makanosaxaespi diáconosliajwa, japibej puexa jiw chiekal sitaenspilis. Japibej kichachajba-el. Japibej saxa fe-el saxsliawas. Japibej nejchaxoela-el isliajwa babijaxan xabich plata kanaliajwa. **9** Japibej babijax is-el, chiekal naexasit xoti diachwujajnakolaxpox, Cristo pejwujajan. Japi nejchaxoel wut Jesús pejwujajanliajwa, nejchaxoela-el: “Ampawujajan diachwujajnakolaxa-el” —chi-eli, nejchaxoel wut. **10** Makanosaxaespi diáconosliajwa, japi matxoela xapaejaxaes naexasiti

Jesús pejwɔajan, matabijaliajwa japi pachaem wɔt. Japi pachaem wɔt, makanosaxaes diáconosliajwa. **11** Makanosaxaespi diáconosliajwa, japi pejwatho' chiekal sitaeyaxaespi asew jiw. Japi watho'bej bɔxwɔajanmaenkaxilpi asew jiwliajwa. Japi watho'bej pajut chiekal natataefɔlpi, asax isasamata, pachaemaelpox. **12** Poejiw makanosaxaespi diáconosliajwa, japi kaenanɔla pijowaxaelpi. Japibej chiekal matabijapi paxi tato'laliajwa, pejbachanpijiwbej. **13** Japi diáconosbichax chiekal isfɔl wɔt, puexa jiw chiekal sitaeyaxaespi. Ja-aech wɔt, diáconos bɔxdalaxil pajut chapaeliajwapi puexa jiw naexasitpox Jesucristo pejwɔajan.

### **Pablo lelpox naewɔajnalijwapon Timoteo diachwɔajnakolaxpox Jesucristoliajwa**

**14** Timoteo, xan ampox carta lelx wɔt, nejchaxoelx: “Asamatkoi chalechkal pasaxaechan Éfeso paklowaxxot Timoteo taeliajwan” —an, nejchaxoelax wɔt. **15** Pe nakiowa, xan piach kijlax wɔt pasliajwan xamxot, ampox carta xaljowam wɔt, xam matabijsaxaelam, naexasiti Jesús pejwɔajan machiyaxael, duil wɔt. Japi jiw, Dios pomatkoichapon pejiwpi. Samata, japi jiw naewɔajnaxael asew jiw Jesús pejwɔajan. Japibej bɔxfiasaxael, asew jiw naewɔajan wɔt asawɔajan, Jesús pejwɔajana-el wɔt. **16** Jesús pejwɔajan diach chiekal wɔajnakolax xabich pachaem, xatis naexasichpox. Dios nakkajachawaet japawɔajan jɔmmatabijaliajwas. Jiw himnotat jajuw wɔt, jɔm-aechi:

“Cristo nalaelt ampathatat. Do jawɔx, Cristo tɔp wɔt cruztat, tres matkoi wɔt, Dios mat-ech wɔtbejpon, pejme dukon, jiw pajut matabijaliajwa Cristo Dios paxɔlanpon. Jawɔx japon bɔ'fos Dios athɔse, Dios poxase. Jawɔt ángeles taenpi Cristo. Do jawɔx, Cristo pejnachala naewɔajan xabich asew jiw, asatɔajnuchanpijiw, Cristo pejwɔajan. Samata, japi xanaboeja Cristo” —aech jiw, jajuw wɔt himno.

### **Asew jiw kofaxaelpox Jesús pejwɔajan naexasitpoxliajwa**

**4** Espíritu Santo nakjɔm-aech xatis chiekal matabijaliajwas ampox. That toepax mox pawɔajna wɔt, naexasitpixot Jesús pejwɔajan, asew jiw kofaxael, japi jiw naekichachajbaxaes xot. Japi asew jiw naewɔajnaspox naexasisaxaeli. Japanaewɔajna, Satanás pejnaewɔajna. **2** Japi naexasisaxael naekichachajbapijiw

naewuajanpoxan. Japawuajan, me-ama diachwuajnakolax wut, wejachiyaxaesipox. Naekichachajbapijiw asew jiw naewuajan wut, padalaxili. Samata, chiekal nejmach naewuajnaexaeli. **3-4** Japi naekichachajbapijiw naewuajan wut, japi asbuan jumch jiw fiasaxael nakjiyasamata. Kaechafiasaxaelbejpi asanaxaeyaxan, nejmachnaxaeyaxan jiw xaesamata. Pe xatis, Jesús pejwuajan naexasichpis, chiekal matabijas. Xatis Diosliajwa graciastis wut, puexa Dios ispoxan pachaem xaeliajwas. Kaen aton jumchiyaxil: “Ampox xaelx wut, pachaemaxil Diosliajwa” —chiyaxilon. Dios ispoxan xaes wut, graciaschiyaxaes Diosliajwa. **5** Dios pejjamechan, chajia lelspox, jum-aech wut, jum-aechox: “Puexa nejmachnaxaeyaxan pachaem xatis xaeliajwas” —aechox. Samata, Diosliajwa graciastis wut, japoxan pachaem xatis xaeliajwas.

### Pablo naewuajanpox Timoteo

**6** Xam chiekal naewuajnam wut naexasiti Jesús pejwuajan xan jum-anpoxan, ja-am wut, xam pachaemaxaelam Jesucristo tanbichliajwam. Xam kaes Dios xanaboejsliajwam, chiekal naexasisaxaelam chajia xan jum-anpoxan, xam naewuajnaex wut.

**7** ¡Nabej naexasis jiw pajut faekwuajan, japi naewuajan wut japox! Japawuajan pachaema-el, Dios pejjamechana-el xot. ¡Xam chiekal matabijtam naexasisliajwam Dios jum-aechpoxan! **8** Najaesax pachaem wajbu'anliajwa. Pe kaes pejme pachaem xatisliajwa Dios xanaboejaspox. Samata, xatis laelpas wut, Dios nakkajachawaesaxael. Baxael, tups wutbej, Dios nakkajachawaesaxael duilaliajwas japonxotse. **9** Ampoxlap diachwuajnakolax. Samata, xatis puexa chiekal naexasisaxaes. **10** Samatabej, xatis xabich nabistas Dios pijax bichax. Jatis Dios, pomatkoicha dukpon, xanaboejas xot. Dios puexa jiw bu'weyaxael, naexasiti Jesús pejwuajan.

**11** ¡Xan lelxpoxan xam jiw naewuajande! ¡Jiw tato'aldebej ampoxan chiekal naexasisliajwapi! **12** Diachwuajnakolax xam chiekal pati'na-emil. Pe nakiowa, xam naewuajnam wut, ¡nabej tapae' jiw naewuajnampoxan naexasislasamata, chiekal pati'na-emil xot! Jesús pejwuajan naexasitixotam wut, ¡chiekal dukde xam japi jiw nakxataeliajwa! ¡Jiw naewuajnam wutbej, chiekal chamoeyaxtat naewuajande! ¡Nejxasinkdebej asew jiw! ¡Dios chiekal xanaboejsfuldebej xam kajachawaesliajwapon! ¡Nabej

isbej babijaxan! **13** Xan pas-enil wutfuk xamxot, naexasiti Jesús pejwujajan suapich, natamejlam wut, ¡Dios pejjamechan, chajia lelsprox, chanaexaljoem! Do jawut, ¡chiekal chanaekabuanimbej japoxanliajwa jiw nejchachaemlialijwa, Dios kaes xanaboejalijwabejpi! **14** ¡Isfulde Dios xam tato'alpoxan! Ja-am wut, Dios kajachawaesfulaxael. Nejchaxoelam wutbej, ¡nejchaxoelde ancianos majt ki-owapoxliajwa nejta'tat, Dios kawujajan wuti xamliajwa! Jawut ancianos Dios to'as japi xam jumchilialijwa: “Dios xam makafit japon tanbichliajwam” —chilialijwapi.

**15** ¡Puexa xan tato'laxpoxan chiekal isfulde! Ja-am wut, puexa jiw xam taeyaxael chiekal dukampox. **16** ¡Najut chiekal natataeflfulde babijax isasamatam! Jiw naewujajnam wutbej Dios pejjamechan, ¡naewujajande, me-ama Dios nejxasink! ¡Nabej kofs Dios naexasitampox! Ja-am wut, Dios xam bu'weyaxael. Xam naewetibej, Dios bu'weyaxaesbej japi jiw.

### **Machiyaxaelpox Timoteo, duk wuton Jesús pejwujajan naexasitixot**

**5** Aton, pati'in, is wut pachaema-elpox, japon fiatam wut, ¡nabej los! Naewujajnam wut isproxliajwa, ¡chiekal naewujajande! Me-ama nej-ax jum-am wut, ¡ja-amde japon atonliajwa! Watho', pansiachow, naewujajnam wutbej, me-ama nakoew naewujajnam wut, ¡ja-amde! **2** ¡Watho', pakdiachow, sitaem! Me-ama nej-en wut, ¡ja-amde! ¡Watho', pansiachow, sitaembej! Me-ama nakoewkola wut, ¡ja-amde! ¡Nabej bu'nejchaxoele' asax isax, japi watho' suapich!

### **Amxot jum-aechpox, watho', pamaljiw naetupsi, japi naexasiti Jesús pejwujajan**

**3** ¡Naewujajande naexasiti Jesús pejwujajan, japi kajachawaesliajwa asew watho', pamaljiw naetupsi, japi watho' pejjiw chiekal kijilpi kajachawaesliajwas! **4** Watho', pamaljiw naetupsi, paxi, pamojiwbej, pakdiachow wut, ja-aech wut, nej kajachawaesas japi watho'. Amwutjel, japi pakdiachow xot, ¡nej tataefle' penjiw, pae'jiwbej! Ja-aech wut, Dios nejchachaemlaxael japi jiwliajwa. **5** Watho', pamaljiw naetupsi, diachwujajnakolax pejjiw chiekal kijilpi, japi watho' Dios xanaboeja kajachawaesfulalialijwas. Japi watho' bu'xkofa-elbej Dios kawujajnaxpoxan matkoi, madoibej, Dios kajachawaesfulalialijwas.



**6** Asew watho', pamaljiw naetɔpspi, pajut isasiapoxan, pachaema-elpoxan, isful wut, ja-aech wut, japi watho', me-ama patɔpa, jachiyaxaeli Diosliajwa. **7** ¡Jesús pejwɔajan naexasiti to'im kajachawaesliajwapi watho', pamaljiw naetɔpspi! Jesús pejwɔajan naexasiti chiekal kajachawaet wut japi watho', chinax kaen aton, Jesús pejwɔajan naexasis-elpon, wɔljɔmchiyaxil babejjamechan Jesús pejwɔajan naexasitiliajwa. **8** Aton, Jesús pejwɔajan naexasitpon, japon kajachawaes-el wut pejjiw, pejjiwkolabej, ja-aech wut, asew jiw matabijaxaeson, japon aton koft Jesús pejwɔajan naexasitpox. Me-ama naexasis-eli Jesús pejwɔajan, jachiyaxil japon. Kaes pejme chaemilaxaelon. Naexasis-elpi Jesús pejwɔajan, japi chiekal tataeful pejjiw.

**9** Watho', pamaljiw naetɔpspi, japi kaes sesenta waechanpi wut, japi pejwɔlan lelaxaes pelfutat, kajachawaesliajwas naexasiti Jesús pejwɔajan. Japi watho' pamaljiw naetɔps wut, pejme poejiw nos-eli. **10** Japi watho' chiekal matabijas asew jiw, majt is xoti pachaempoxan asew jiwliajwa, pamaljiw naetɔpa-esal wuti. Japi watho'bej majt paxi wut, chiekal tataeful. Japi watho'bej chiekal bu'kɔla, asew jiw pat wut japi pejbatat. Japi watho'bej majt tuakkiatpi, naexasiti Jesús pejwɔajan pat wut japi pejbatat chiekal bu'kulaliajwa. Japi watho'bej majt kajachawaetbej asew jiw, nabijat wut. Isbejpi puexa pachaempoxan asew jiwliajwa. Me-ama japi watho', jasi watho'lap, kajachawaesaxaes naexasiti Jesús pejwɔajan.

**11** ¡Watho', pamaljiw naetɔpspi, sesenta waechana-elpifuk, japi pejwɔlan nabej lele' pelfutat, naexasiti Jesús pejwɔajan kajachawaesliajwas! Japi watho' pejme nosaxael wut poejiw, ja-aech wut, bej kofaxaelbejpi Jesús pejbichax nabistpox. **12** Ja-aech wut, japi watho' pejbu'wɔajnaxael Diosliajwa, chiekal is-el xoti jɔmduwɔpox, Dios tanbichaxaelpox. **13** Ja-aech wut, japi watho' asbuɔan jɔmch nanɔamsaxael asabachan mathɔnaliajwa. Ja-aech wutbej, japi watho' kiwecha nadofaxael. Buɔwɔajanmaenkaxaelbejpi. Buɔxxandadɔsaxaelbejpi. Japi watho'bej jɔmchiyaxael asew jiwliajwa pachaema-elpoxan jɔmchiliajwa asew jiw. **14** Samata, watho', pamaljiw naetɔpspi, japi chiekal pakdiachowa-el wutfuk, xan jɔm-an japi watho' pejme nakjiyالياjwa. Ja-aech wut, paxi wulxaeli. Chiekal tataeflaxaelbejpi jiw pejbachanpijwi. Ja-aech wut, wajdaelmajiw babejjamechan jɔmchiyaxisal japi watho'liajwa. **15** Xan japox

jum-an, asew watho', pamaljiw naetupspi, kofa xoti Jesús pejwajaan naexasitpox. Do jawax, asbuan jumch islisi Satanás tato'alpoxan.

**16** ¡Watho', naexasiti Jesús pejwajaan, japi watho' kaenanula nej kajachawaes pejjiw, watho', pamaljiw naetupspi! Japi japox isful wut, ja-aech wut, asew, naexasiti Jesús pejwajaan, xajuraxael kajachawaesliajwa asew watho', pejjiw chiekal kijilpi.

### **Jesús pejwajaan naexasiti, japi sitaeyaxaelpox ancianos**

**17** Ancianos chiekal tataeful wut naexasiti Jesús pejwajaan, ja-aech wut, ¡chiekal nej sitaes! ¡Ancianosbej chiekal nej mosas, pomatkoicha naewajaan wuti, chiekal chanaekabwana wutbejpi jiw Dios pejjamechan! **18** Dios pejjamechan, chajia lelspx, jum-aech wut, jum-aechox: “Woei xanbistam wut trigo matbok-kiyanaliajwa, ¡woei nabej kaechjoele' bozal trigo xaesamata!” —aechox. Jum-aechbejpx: “Kaen aton nabist wut asanliajwa, ¡japon nej mosas!” —aechox. Samata, ¡ancianos chiekal nej mosas, pomatkoicha chiekal naewajaan wuti, chanaekabwana wutbejpi asew, Jesús pejwajaan naexasiti!

**19** Asan aton xam jum-aech wut: “Xan taenx, anciano babijax is wut” —aech wuton, ¡japox kamta nabej naexasisfuk! Pe kolenje, o, tres aton, japox kaeyax chiekal jum-aech wut, ja-aech wut, ¡japi chiekal naexasi'e!

### **Pablo kaes lelpox, naewajanaxan Timoteoliajwa**

**20** Diachwajnakolax ancianos babijaxan isful wut, ¡fia'e puexa Jesús pejwajaan naexasiti pejwajnale! ¡Japoxlap xamal ja-amde puexa Jesús pejwajaan naexasiti pejlewlaliajwa, japibej babijaxan isasamata!

**21** Paklon babijax is wut, o, paklona-elpon wutbej, ¡japi fia'e! Xam japox to'ax isliajwam. Dios chiekal matabijt, Jesucristo suapich, ángelesbej, xam to'axpox isliajwam. **22** Xam Timoteo, ki-osasiam wut aton pejta'tat japon aton makafis-liajwam ancianoliajwa, japon tato'laliajwa naexasiti Jesús pejwajaan, ¡xam majt chiekal nejchaxoelde japon atonliajwa! Chiekal matabijs-emilpon makafitam wut ancianoliajwa, asamatkoi japon aton babijax is wut, ja-aech wut, japi jiw xam wuljumchiyaxael: “Timoteo kaenejchaxoelax, japon aton

suaꝑich, japox babijaxliajwa” —chiyaxael japi jiw xamliajwa. Dukam wut, ꝑchiekal najut tataefulde pomatkoicha babijax isasamatam!

**23** Asamatkoi xam nejpoklawoejt chalechkal xabich jiwe-xaenk. Ja-aech wut, ꝑnabej fe' minkal! ꝑCha-aeldoehc taniaalde vinomint!

**24** Asew jiw babijaxan is wut, puexa jiw japoxan chiekal matabija. Samata, japi tasalas. Pelax asew jiw maliach babijaxan is wut, matabija-esal. Pe baxael, japi tasalas wut, jawut puexa jiw matabija japi babijaxan ispoꝑan. **25** Jiw tulaela is wutbej pachaempoxan, puexa jiw chiekal taen. Asew jiw, tulaela is-el pachaempoxan. Pe japoxan asamatkoi puexa jiw chiekal matabijaxael.

**6** Jesús pejwuaꝑan naexasiti, esclavos wut, japi chiekal sitaeya-xael pejpaklochow. Ja-aech wut, asew jiw wulꝑumchiyaxisal esclavosliajwa: “Japi esclavos naexasitwuaꝑan, chiekal pachaemael” —chiyaxil asew jiw. Japi jiwbej ꝑumchiyaxil babejjamechan Diosliajwa. **2** Japi esclavos nejchaxoelaxilbej: “Tajpaklon Jesús pejwuaꝑan naexasit xot, chiekal sitaeyaxinil” —chiyaxil esclavos, nejchaxoel wut pejpaklochowliajwa. ꝑJapi kaes chiekal nej nabich pejpaklochowliajwa!

### **Jesús pejwuaꝑan naexasiti, japi xanejchachaemlaxaelpox pejew**

**3** Asew jiw naewuaꝑan, asawuaꝑan, wajpaklon Jesucristo pejwuaꝑana-elpox. Japi naewuaꝑana-el diachwuaꝑnakolaxwuaꝑan. Japi jiw naewuaꝑana-elbej asew jiw chiekal duilialiajwa, me-ama Dios nejxasink. **4** Japi jiw, asawuaꝑan naewuaꝑanꝑi, nejchaxoeli: “Xatis puexa matabijas. Me-ama asew jiw, jachi-esal” —aechi, nejchaxoel wut. Pe japi pajut chiekal matabija-el asew jiw naewuaꝑanaspoꝑ. Japi nejxasink wuaꝑan nabunlosliajwa, pachaema-elpox. Nakaewa nusasiowlamaenkbejꝑi. Nakaewa najum-aechmaenkbejꝑi babejjamechan. Chiekal nakaewa naxanaboeja-elbejꝑi. **5** Nabuxkofa-elbejꝑi nabunlosax, pejnejchaxoelaxan chaemil xot. Matabija-elbejꝑi diachwuaꝑnakolaxpoꝑ. Kaenanula asbuan ꝑumch nejchaxoel: “Xan naewuaꝑanax wut Dios pejjamechan, xabich plata kanaxaelen” —aechi asbuan ꝑumch, nejchaxoel wut. **6** Xatis, Jesús pejwuaꝑan naexasichꝑis, Diosliajwa, me-ama kimaenkas wut, jatis, xanejchachaemlas

wut Dios nakchaxduwpoxan. **7** Ampathatat nalaelas wut, chiekal masox nalaelas. Asamatkoi tups wutbej, kaeyax xalaeyaxisal, ampathatpijax. **8** Samata, ampathatat xatis naxaeyaxan wut xaeliajwas, naxoe wutbej naxoeliajwas, japoxanliajwa xanejcha-chaemlaxaes. **9** Pelax kimaenkasiapi, japiliajwa tampoela-el naekichachajbaliajwas japi babijaxan isliajwa. Samata, japi babijaxan is kimaenkaliajwa. Ja-aech wut, kofaxili babijaxan isfulpoxan. Samata, baxael, xabich babijaxan is xot, nabijasa-xaeli. Napelsaxaelbejpi Diosliajwa. Me-ama choef muthadik natacholika, jachiyaxael japi kimaenkasiapi. Japamuthxotdik japi weyaxil. Tup wut, chiekal toepaxaeli. **10** Jiw xabich kimaenkasia wut, babijaxan is plata kanaliajwa. Ja-aech wut, kofapi Dios naexasitpox. Samata, amwutjel japi jiw pajut ispoxantat xabich nabijat.

### **Pablo Timoteo naewwajanpox Dios kaes xanaboejsliajwapon**

**11** Timoteo, xam nabistamponam Diosliajwa, nejchaxoelam wut, inabej nejchaxoele' kimaenkaliajwam! Me-ama asew jiw nejchaxoel kimaenkaliajwa, ixam nabej ja-aeché! ¡Isfulde pachaempoxan! Dukam wut, ichiekal dukde, me-ama Dios nejxasink! ¡Dios xanaboejde xam kajachawaesliajwa! ¡Nejxasinkdebej asew jiw, naexasiti Jesús pejwajan! Nabijatam wutbej, inabej kofs Dios naexasitampox! Nejchaxoelam wut, inabej nejchaxoele': "Xan kaes pejme pachaeman. Me-ama asew jiw, jachi-enil" —nabej aeche', nejchaxoelam wut! **12** ¡Xam chiekal naexasisfulde Dios! Me-ama kaen aton xabich najaet puexa pejpamamaxtat premio kanaliajwa, xambej jamde, dukam wut! ¡Chiekal dukde, me-ama Dios nejxasink! Ja-am wut, asamatkoi, dukaxaelam pomatkoicha Diosxotse. Japoxliajwa Dios xam chajia makafit. Asew jiw xam bautisa wut, jawut xabich jiw pejwajnalel xam jum-am: "Xan pomatkoicha chiekal naexasisfulaxaelen Jesús pejwajan" —am xam jiw pejwajnalel. **13** Amwutjel lelx xam to'aliajwan isaxaelampox. Japox lelx wut, Dios matabijt. Japon pijaxtat puexa xatis chiekal duilafulas. Jesucristobej matabijt xan lelxpox xamliajwa. Jesús nuk wut Poncio Pilato pejwajnalel, jawut jum-aechon diachwajnakolaxpox pajutliajwa. **14** Xan jum-an xam puexa chiekal naexasisliajwam xan lelxpoxan.

¡Chiekal naexasisfulde puexa xan jum-anpoxan, asey jiw xam wuljumchisamata: “Ampon aton chiekal naexasis-el Dios” —chisamata asey jiw xamliajwa! ¡Xan jum-anpoxan naexasisfulde, hasta wajpaklon Jesucristo pejme fuloek wut! **15** Pat wut Dios markpox, matkoi, Jesucristo pejme pasaxoek. Dios, kaen, japon paklokolan puexa jiw tato'laliajwa. Japonbej xabich pachaem. Ampathatpijwato'alpi, puexa japibej Dios tato'laxaesi. **16** Dios, kaen, japon tuxaxil. Dios dukxotse xabich itliak. Chinax kaen aton jaxotse pasaxil, tupa-el wutfuk ampthatat. Chinax kaen aton taeyaxilbej Dios. Pomatkoicha puexa jiw jumchiyaxael: “Dios, xam xabich pachaemam” —chiyaxael jiw pomatkoicha. ¡Diachwujnakolax japox jachiyaxael!

**17** ¡Naewwajande kimaenkpi, japi nejchaxoelasamata: “Xan xabich tejew. Samata, kaes pejme xan pachaeman. Me-ama asey jiw, jachi-enil” —chisamatapi, nejchaxoel wut! Kimaeyax chalechkal toepaxael. Samata, ¡xam naewwajande kimaenkpi japi pejew xanaboejasamata! ¡Japi naewwajande Dios xanaboejalijwapi, japon tataeflaliajwas! Dios puexa xatis nakwewe'poxan nakchaxduw chiekal duilaliajwas. **18** ¡Kimaenkpi to'im, japi jiw kajachawaesliajwa! **19** Ja-aech wut, kimaenkpi Dios chaxduiyaxaes kaes pejme ommaenkpoxan japonxotse. Japoxan pomatkoichaliajwa. Ja-aech wut, japi kimaenkpi pomatkoicha duilaxael Diosxotse.

### **Pablo lelpox ampacarta taxdukanaewwajnaj Timoteoliajwa**

**20** Timoteo, ¡chiekal jiw naewwajande Dios pejjamechan, me-ama Dios xam to'a! ¡Nabej naewes asey jiw pajut faekwujjan! Japawwajan Diosliajwa pachaema-el. Japi pajutliajwa najum-aech asey jiw jumtaeliajwas: “Xan kaes pejme matabijtax. Me-ama asey jiw, jachi-enil” —na-aechi pajutliajwa. Jasi jiw naewwajan wut, ¡nabej naewes, japox wujjan diachwujnakolaxa-el xot! **21** Asey jiw lax japox wujjan naexasit, naewwajnas wut. Samata, amwutjel kofalisi Jesús pejwujjan naexasitpox.

Xan Dios kawwajnaj xam kajachawaesfulaliajwapon, asey naexasitpiliajwabej Jesús pejwujjan, Éfeso paklowaxpijw.